

25 OCT 2000

PBRS PUNYA TUGAS BESAR BANTU BN MAJUKAN SABAH, KATA PM

KOTA KINABALU, 25 Okt (Bernama) -- Perdana Menteri Datuk Seri Dr Mahathir Mohamad berkata Barisan Nasional (BN) mempunyai tanggungjawab yang besar bagi memastikan kesejahteraan dan kestabilan rakyat terus terjamin di negara ini.

Katanya, sebagai anggota BN, Parti Bersatu Rakyat Sabah (PBRS) tidak terkecuali dalam memainkan peranan tersebut terutama dalam menjamin BN di Sabah terus unggul dan diyakini rakyat.

Beliau berkata demikian dalam kata-kata aluannya yang dimuatkan dalam buku cenderamata sempena kongres tahunan PBRS pada 27 hingga 29 Okt.

"Parti-parti komponen BN di negeri ini harus berusaha memupuk rakyat yang berfikiran terbuka dan rasional agar dapat sama-sama bersaing dalam apa jua bidang dengan kaum-kaum lain di Malaysia," katanya.

Dr Mahathir berkata pemikiran sempit yang hanya berasaskan kepada kesukuan dan kenegerian tidak membawa faedah kepada rakyat atau negara.

"Oleh itu, saya harap ini akan menjadi matlamat utama PBRS dan semua parti komponen BN Sabah dalam menempuh cabaran alaf baru ini," katanya.

Berbekalkan semangat "Malaysia Boleh" dan "Sabah Boleh", beliau percaya BN Sabah boleh melakukannya, katanya.

Beliau berkata perpaduan adalah aset penting dalam meneruskan perjuangan BN untuk membela nasib rakyat dan memajukan negara.

Sementara itu, Timbalan Perdana Menteri Datuk Seri Abdullah Ahmad Badawi dijangka menyempurnakan upacara perasmian kongres PBRS itu pada 28 Okt di Nexus Resort Karambunai, Menggatal.

-- BERNAMA

NT NMO